


**N**GA MAHI A TE  
MINENGA TUA-  
RIMÁ O TE HUI TOPU  
O TE HAHI MAORI O  
TE PIHOPATANGA O  
WAIAPU I TU KI MA-  
NUTUKE, I TE 10, I  
TE 11 O MAEHE, 1902.



TURANGA: NA TE WI-  
REMU HAPATA I TA,  
KI TE PEREHI KI TE  
RAUKAHIKATEA, 1902.



NGA TANGATA O TENEI HUI.

UPOKO: TE PIHOPA.

MINITA:

*TAKIWA O HERETAUNGA.*

TE WIREMU HAMIORA, ATIRIKONA.

|                       |                      |
|-----------------------|----------------------|
| REV. TAMIHANA HUATA * | REV. AHIPENE RANGI.  |
| " A. F. WILLIAMS      | " KATENE PUKERUA.    |
| " NIRAI RUNGA         | " HEMI PITITI HUATA. |
| " HOETA TE HATA *     |                      |

*TAKIWA O TURANGA.*

|                        |                     |
|------------------------|---------------------|
| REV. TE WIREMU HAPATA. | REV. HONE WAITOA.   |
| " MOHI TUREI.*         | " RUTENE TE AIHU.   |
| " MATIAHA PAHEWA.      | " HAKARAIA PAHEWA.  |
| " E. JENNINGS.*        | " R. TE RANGAMARO.* |
| " MATENGA WAAKA.       | " A. TAMIHERE.      |

*TAKIWA O TAURANGA.*

|                   |                       |
|-------------------|-----------------------|
| REV. W. GOODYEAR. | REV. R. TE AWEKOTUKU. |
| " RAMEKA HAUMIA.  | " TURUTURU NGAKI.     |

\* Kihai enei i tae ki te Hui.



499m  
1902  
CHU  
16.1.64  
113,513

# MANGAI REIMANA:

|                        |    |    |    |                           |
|------------------------|----|----|----|---------------------------|
| PENE TE UAMAIRANGI     | }  | .. | .. | Heretaunga.               |
| UTIKU PAETAKA          |    |    |    |                           |
| TUTAWAKA RAMEKA        |    |    |    |                           |
| TARANAKI TE UAMAIRANGI |    |    |    |                           |
| ARAPATA TAKAHI         | }  | .. | .. | Mohaka.                   |
| KERE WAIHAPE           |    |    |    |                           |
| IHAKARA TE AMO *       | }  | .. | .. | Mahia.                    |
| OPERE WHANGA *         |    |    |    |                           |
| TE TEIRA RINGARORE     |    |    |    |                           |
| TAME ARAPATA           | }  | .. | .. | Turanga.                  |
| HAPE KINIHA            |    |    |    |                           |
| RUTENE TE ARAHI        | .. | .. | .. | Whangara.                 |
| HORI TOHUNGIA          | .. | .. | .. | Tokomaru.                 |
| WI TAHATA              | .. | .. | .. | { Whareponga.<br>Tuparoa. |
| PARAONE TUREI          | .. | .. | .. | { Te Horo.<br>Rangitukia. |
| WATENE TE AKAU *       | .. | .. | .. | Whareponga.               |
| HOHEPA KARAPAINA *     | .. | .. | .. | Raukokore.                |
| WI REPA                | .. | .. | .. | Te Kaha.                  |
| HAAKA TAUTUHI *        | .. | .. | .. | Torere.                   |

\* Kihai enei i tae ki te Hui.



## HE TUHITUHINGA

I NGĀ MAHI A TE MINENGA TUARIMA O TE HUI  
TOPU O TE HĀHI MAORI O TE PIHOPATANGA O WAI-  
APU, I TU KI MANUTUKE I TE IO O NGĀ RA O MAEHE,  
I TE TAU 1902.

---

**N**O te 9 o ngā ra o Maehe i tae ai ngā tangata o te  
Hui me te tangata whenua ki te karakia ki te  
Wharekarakia o te Tokotorutanga Tapu Tōnu; e 43  
i tango i te Hapa a te Ariki; i puta hoki te kohikohi o  
te Ohāohatanga e £4 12s. 10d., mo te perehitanga i ngā  
Mahi a te Hui.

No te 11 o ngā haora i te awatea i te 10 o ngā ra o  
Maehe i huihui ai ngā tangata o te Hui ki te Whare-  
karakia, karangarangatia ana ngā ingoa, me te whakao  
enei:—

*Minita*: Te Wiremu, Atirikona, Rev. Matiaha Pahe-  
wa, Te Kūtio, Te Wiremu Aata, Te Wiremu Hapata,  
Rutene Te Aihu, Matenga Waaka, Hone Waitoa,  
Ahipene Rangi, Hakaraia Pahewa, Rameka Haumia,  
Hemi Huata, Aperahama Tamihere, Nirai Runga,  
Ratema Te Awekotuku, Katene Pukerua, Turuturu  
Ngaki.

*Mangai Reimana*: Pene Te Uamairangi, Utiku Pae-  
taka, Tutawake Rameka, Taranaki Te Uamairangi,  
Arapata Takahi, Kere Waihape, Tame Arapata, Hape  
Kiniha, Rutene Te Arahi, Hori Tohungia, Wi Tahata,  
Paroane Turei, Wi Repa.

Katahi ka ki te Pihopa kua tu te Hui, ka timataia  
hoki e ia te mahi ki te inoi.

Muri iho ka whai-korero te Pihopa ki te Hui.

---

## TE WHAI-KORERO A TE PIHOPA

**T**E mea e mine nei tatou, ngā Minita, ngā  
Reimana, i ia tau, i ia tau, ki te Hui o  
te Hāhi Maori, ko te tiro tiro i te ahua o te  
mahi a te Hāhi i roto i a tatou, kia mahue ai

nga mea e he ana, kia whai kororia ai to tatou Matua i te Rangi. E kiia ana tenei, ko te Hui Topu, kua huihui mai nei hoki nga Minita, nga Reimana, o nga wahi katoa o te Pihopatanganga. Heoi ma te Wairua o te Atua tatou e whakamahara ki nga mea e tupu pai ai nga mahi a tana Hahi; he ahua taimaha nei hoki etahi o nga mea hei hurihuri ma tatou i tenei wa.

**I. Te Oranga Minita.** Ko te tautoko a te Ropu Tono Mihinare o te Hahi i Ingarani i nga Minita o te Hahi Maori, ka mutu i te mutunga o tenei tau. Nuku ake i te 80 nga tau i ata whakatupuria ai te Hahi Maori: kua tutuki tenei ki te kaumatuatanga; mana ano e whakaaro he oranga mona. Nga kai-hautu o nga mahi a te Hahi, ko nga Minita; mo konei hoki ta te Karaiti kupu, “Ka tika te utu mo te kai-mahi”: (Rk. x. 7.) me ta Paora, “Ta te Ariki i whakarite ai mo nga kai-kauwhau i te Rongo-pai, hei runga i te Rongo-pai he oranga mo ratou.” (1 Kri. ix. 14.) Koia e whakahaua nei te Hahi katoa i Niu Tirani nei, te taha Pakeha, me te taha Maori, kia whakaputa wawe i tetahi whakaaro mo tenei mea, kei ahua maero te mahi a te Hahi i te mea ka mahue i te Minita tana mahi ake, kia kimi oranga ai ia mona, mo nga tangata hoki o tona whare.

**II. Te Whakatupu o nga Tamariki.** Tetahi mea kua maha nei nga kororotanga i nga tau kua pahure nei, ko te aitua e tami nei i nga tamariki a te Hahi, kahore nei hoki ratou e ata whakaakona ana ki nga tika nga a Te Karaiti. He pai te mahi a nga kura kua tu nei i te Kawanatanga ki te tini o te kaininga Maori; otira heoi ano ta te ture a te tangata i tohutohu ai, ko te matauranga anake ki nga mea o te taha ki te tinana. Ko te taha ki te wairua, ma nga matua e whakaaro, ratou tahi ko nga tangata katoa o te Hahi; he wahi nei hoki tatou katoa no te tinana o Te Karaiti; me whai hoki e tatou kia whakatupuria a tatou tamariki katoa i runga i te wehi ki te Atua. Na te kore o tenei i hua ai te mahi tutu a te taitamariki.

**III. Te marena.** Tetahi hua o te whakatupu he o a tatou tamariki, ko nga raru raru e puta nei i runga i te marena o etahi.

Me pehea e matau ai nga taitamariki ki ta te Atua ture i whakatakoto ai mo te marena, ki te kore e ata whakaakona? Otira ehara i te mea kei nga tamariki anake te he, engari kei nga matua ano tetahi. Kahore hoki e tika ma nga matua anake e whakarite te marena o nga tamariki. Ki ta te Atua i whakatakoto ai me pumau tonu ki a raua nga mea e marenatia ana, a mate noa tetahi o raua; koia i tika ai kia kua nga matua e kaika ki te hono i nga tamariki i runga i te marena, engari me ata pupuri kia kitea ra ano to raua pai ki a raua, katahi ka tuku ki te marena.

Me e ata whakahaerea ana tenei e nga matua, kua pai pea te noho o nga taitamariki ki a raua, o te tane, o te wahine, i te mea kua oti te marena; kua kore e whakarere tetahi i tetahi, te mea e ki nei te Atua, "E kino ana ahau ki te whakarere." (Mar. ii. 16.) Tera ano tetahi mea i tupu ai te mahi whakarihariha, i whakawaia ai hoki etahi o a tatou tamariki, i poke ai, ko etahi o nga haka e meatia nei hei rekareka mo te twi Maori, hei matakitaki hoki ma te Pakeha. Ko nga kupu o aua haka, he kino, he whakaoho i nga hiahia o te tinana, a tau iho te he i te tane Pakeha ranei, Maori ranei, ki nga tamariki wahine. Ko tetahi mea nui tenei e heke ai te tupu o te iwi Maori, e ruarua haere ai. Kauaka tetahi o tatou e ngakau-kore ki te pehi i enei mahi poauau; kia hono tonu ano ia te puta o te inoi ki te Atua, mana tatou e tohutohu, e whakakaha, e taca ai. Tera ano pea e taca tenei te tautoko e nga Kaunihera Takiwa kua tu nei i runga i te ture a te Paremete.

**IV. Moni kawanga whare.** Me whakaputa e ahau i konei tetahi kupu mo etahi o nga moni e kohikohia ana hei hapai i etahi o nga mahi a te Hahi. He maha nga moni kua kohikohia i enei tau kua pahure ake nei, kihai i ata tiakina e nga tangata i whakaritea hei tiaki; he mea whakaputa ke ranei ki runga ki etahi mea, ehara nei i te mea i kohikohia ai. I te mea ka huaina he kohikohi mo te hanga Whare-karakia ranei, mo tetahi atu mea ranei, e kore e ahei kia whakaputaia ketia te moni o taua kohikohi ki tetahi mea ke, ki te kore e marama te whakaae a nga tangata katoa i uru ki taua kohikohi. Ki te whakaputaia ketia e

te kai-tiaki, he whakaaro pokanoa nana, kua mau ano ia i te ture mehemea e kawea ana ki te whakawa. Tetahi mea e kitea ana ki etahi o nga kohikohi pera, he whakapehapeha no te tangata, he mea kia whai ingoa tana kohikohi, kia maha hoki nga moni hei nanao mana. Ko etahi hoki o nga hui kawanga Whare-karakia, e apititia ana ki te haka, ki te tini noa iho o te whakaahuareka, ki nga mea kahore e ata tau ki te mahi i hangaa ai te Whare-karakia. Ko nga hui kawanga Whare-karakia me ata whakahaere marire kia ahua rite ano ki te take i karangatia ai. Kahore he he o te kohikohi, otira ko nga moni e kohikohia, kaua e maumauria ki runga ranei ki nga mea i pau i te hui, ki tetahi atu mea pera ranei; engari me tuku ki te tangata e tika ana hei tiaki, ki te tangata tupato, mana e ata whakaputa ki runga ki nga mahi e tau ana, ki nga mea e whai kororia ai te Atua.

He mea enei hei tirohanga ma nga tangata o te Hahi, kia whakahaerea ai e tatou nga mahi i runga i te pai, me ta tatou whai tonu "kia ahua pai, kia tika te meatanga o nga mea katoa." (1 Kri. xiv. 40.)

## NGA MOTINI.

1. Na Rev. Ahipene Rangi, raua ko Hori Tohungia:—

E whakapai ana te Hui ki te whai-korero a te Pihopa, he ki atu hoki tenei ki a ia kia whakaae mai ia kia perehitia tana korero i roto i nga mahi a te Hui.

*Whakaaetia ana.*

2. I meatia a Te Wiremu Aata ratou ko Te Wiremu Hapata, ko Hemi P. Huata hei kai-tuhituhi i nga mahi a te Hui.

3. I whakauria mai a Rev. F. A. Bennett ki tenei tunga o te Hui nei hei whakapuaki i ana korero.

4. Na Tame Arapata raua ko Rev. Hemi Huata :—

Kia kaua nga moni kohikohi a tetahi pariha, kainga ranei, mo nga mahi a te Hahi e riro ma nga tangata anake o taua kainga e tiaki engari kia kotahi minita pakeha hei kai tiaki me te minita ano o taua pariha, me tetahi atu tangata tika e kitea ana e te iwi o taua pariha hei kai-tiaki.

*Whakaaetia ana.*

5. Na Rev. Hemi Huata raua ko Rev. Ahipene Rangi :—

Kia whakaarohia te wero a te Atirikona mo nga tahua oranga minita, kia wehewehea taua moni, ma ia pariha e kohikohi, ma ia pariha e kohikohi nga moni e whakaritea hei kohikohi ma tenei, ma tenei.

I korerotia tahitia te motini a Wi Repa :—

Kia riro ma ia pariha ma ia pariha ano e kahi he oranga mo tona minita, mo tona minita.

I puta te korero a etahi katahi ka whakaritea he komiti hei hurihuri i enei motini : ko te Komiti :

*Minita :* Te Wiremu Aata, A. Tamihere, H. Pahewa, H. P. Huata ;

*Mangai Reimana :* T. Arapata, W. Repa, H. Kiniha, P. Te Ua.

6. Na Rev. Hemi Huata raua ko Rev. A. Rangi :—

Kia whakaungia rawatia e tenei Hui, kia puta he kohikohi i roto i te karakia i nga Ratapu katoa.

*Whakaaetia ana.*

7. Na Rev. H. Pahewa raua ko Rev. H. Huata :—

He whakahau tenei ki nga tangata katoa o te Hahi kia whai kia ata whakatupuria, kia ata whakaakona paitia nga tamariki o te Hahi ki te wehi ki te Atua.

*Whakaaetia ana.*

8. Na Matiaha Pahewa, he patai ki te Pihopa :—

He tikanga tuturu ranei kia kawea nga tupapaku katoa ki roto ki te whare-karakia ina nehua ?

I utua te Pihopa :—

Ehara tena i te tikanga tuturu rawa mo nga tupapaku katoa, ina hoki te kupu o roto o te Karakia tanu tupapaku “kia tika atu ki roto ranei i te whare, ki te Poka ranei.” Tera ano etahi take i kore ai e pai kia kawea te tupapaku ki roto ki te whare-karakia: kei te Minita te tikanga.

9. Na Hori Tohungia raua ko Rev. A. Tamihere :—

He nui te aroha o tenei Hui ki a Peneti i e aue mai ra i roto i te pouri ara i te uauatanga o tera wahi o tenei motu ki nga mahi a te Hahi. He whakahau hoki i nga tangata katoa o te Hahi kia hono tonu te inoi ki te Atua kia whakakahangia ia ki te mahi i tera mahi minita.

*Whakaaetia ana.*

10. Na Rev. A Tamihere raua ko Wi Tahata :—

Kia puta te kupu ma tenei Hui mehemea e taea kia kohia e ia Pariha, e ia Pariha kia £25 i ia tau, i ia tau, hei tapiri mo nga tahua oranga minita o ia Pariha, o ia Pariha, kia tutuki ai ki te £600, nuku ake.

*I nukuhia ki tetahi tau.*

11. Na Rev. H. Pahewa raua ko Rev. Hone Waitoa :—

Kia kaha te tohu o nga minita o ia Pariha o ia Pariha ki te whakaako i nga kaumatua, i nga tamariki hoki, ki nga tikanga o te marena kei kaika noa te kawe i nga tamariki kia marenatia i te mea kahore ano kia ata kitea to raua pai ki a raua.

*Whakaaetia ana.*

12. Na Rev. Hemi Huata raua ko Rev. Te Wiremu Aata :—

1. Kia whakaritea tetahi komiti hei whiri-whiri i nga wahi e he ana o nga mahi mana i runga i nga kawanga wharekarakia, o nga haka maori hoki: ma tenei komiti hoki e whakaatu mai ki tenei Hui ta ratou e kite ai.

2. Ko enei hei tangata mo te Komiti :—

Ko Rev. F. A. Bennett, Hone Waitoa, Katene Pukerua, ko Pene te Ua, Wi Tahata, Tame Arapata me te kai-whakaari.

*Whakaaetia ana.*

13. Na Rev. A. Rangi raua ko Rev. Hone Waitoa:—

E whakaae ana nga tangata o tenei Hui ki te tono a te Pihopa o Meranibia kia tonoa he tangata o te taha Maori kia haere hei kai-kauwhau i te Rongopai o to tatou Ariki ki etahi o nga moutere o Meranibia. E mea ana hoki tenei Hui kia tukua atu e te Tumuaki te kape o tenei motini ki te Pihopa o Meranibia.

*Whakaaetia ana.*

14. Na Rev. A. Rangi raua ko Rev. Te Wiremu Aata:—

E tono ana tenei Hui ki nga Ariki whakahaere o te Hahi ki te taha Maori, kia tukuna he tangata hei toro haere i nga Pariha, he kauwhau hoki i nga tikanga e hohonu ai te whakapono, e marama ai hoki etahi o nga whakahaere o te Hahi e ahua ngaro ana i te nuinga o te tangata.

*Whakaaetia ana.*

Kei konei ka nukuhia ki te 10 o nga haora o te 11 o nga ra o Maehe.

I panuitia, i whakaaetia, 11 Maehe, 1902.

W. L. WAIAPU. UPOKO.

MAEHE 11, 1902.

I TE 10 o nga haora ka huihui ano ki te Whare-karakia, timataia ana te mahi ki te inoi; muri iho ka panuitia, ka whakapumautia nga mahi onanahi.

14. I panuitia te Ripaata a te Komiti whiri-whiri i nga mahi mana.

15. Na Rev. R. Te Awekotuku raua ko Rev. Rameka Haumia:—

Kia puta te uaua o nga minita ki te uiui tu-a-whakaako i nga matua atua me nga matua o nga tamariki i mua i te iriiringa o nga tamariki.

*Whakaaetia ana.*

15. Na Rev. R. Te Awekotuku raua ko H. Tohungia:—

Kia whakaarohia e nga tangata o te Hahi puta noa i tenei Pihopatanga me kore e taea te wehewehe i nga mahi o ia tau, o ia tau, hei apiti i era atu huarahi e neke ake ai te tahua oranga o nga minita me era atu mahi a te Hahi.

*Whakaaetia ana.*

16. Na Tutawake Rameka raua ko Rev. Nirai Runga:—

Kia tu te Hinota o te takiwa o Heretaunga ki Omahu a te tau 1903.

*Whakaaetia ana.*

17. Na Rev. H. Pahewa raua ko Rev. R. Haumia:—

He ki na tenei Hui ki te tumuaki me kore ia e pai kia puta tana whakahau ki nga minita kia whakaritea he karaihe korero Paipera, reo Ingarihi ranei, reo Maori ranei, mo nga tamariki wahine, tamariki tane hoki, o nga kura a te Hahi, i tena kainga, i tena kainga, kia hoki whakamuri ai o ratou whakaaro ki nga tikanga pai i whakaakona ai ratou i reira.

*Whakaaetia ana.*

18. I panuitia te Ripoata a te Komiti i whakaritea ki te hurihuri i nga Motini, mo te Wero a te Atirikona.

19. Na Rev. Hakaraia Pahewa raua ko Wi Repa:—

Kia puta ano te whakaaro o nga minita, o nga mangai reimana o ia pariha, o ia pariha ki te tohe i nga Kannihera Marae o ia kainga, o ia kainga o o ratou nei takiwa ki te arai atu i nga pakeha hianga, mangere, kei noho i roto i nga kainga maori e kiia nei he 'pakeha maori.'

*Whakaaetia ana.*

20. Na Paraone Turei raua ko Wi Tahata:—

He kupu akiaki tenei na te Hui nei ki nga pariha kahore ano kia tu he whare minita, kia tahuri ki te hanga i te whare minita.

*Whakaaetia ana.*

21. Na Rev. Katene Pukerua raua ko Pene te Uamairangi :—

Kia whakaaetia e te Hui te Ripoata a te Komiti whiriwhiri i nga mahi mana, kia perehitia hoki taua Ripoata ki nga Mahi a te Hui.

*Whakaaetia ana.*

22. Na Rev. Te Wiremu Aata raua ko Rev. H. Huata :—

Kia whakaaetia te Ripoata o te Komiti i whakaritea ki te hurihuri i nga motini mo te wero a Te Wiremu : kia perehitia hoki taua Ripoata i roto i nga Mahi a tenei Hui

*Whakaaetia ana.*

23. Na Rev. A. Rangi raua ko Rev. R. Haumia :—

Ko nga moni e kohikohia mo te Wero a Te Wiremu, Atirikona kia tere tonu te tuku atu ki a ia.

*Whakaaetia ana.*

24. Na Rev. H. Huata raua ko Rev. A. Rangi :—

Kia puta to tatou uaua ki te pehi i te Waipiro i ia wahi, i ia wahi i runga hoki i te mea kua whai hoa tatou mo tenei tikanga i roto i nga mahi a nga Kaunihera Maori.

*Whakaaetia ana.*

25. Na Rev. A. Tamihere raua ko Rev. A. Rangi :—

Kia puta he kupu ma tenei Hui kia tae katoa nga minita me nga mangai o te iwi ki te awhina i nga Hui a Ngatiporou ka tu nei ki Tokomaru, ki Wai-o-Matatini ( nga mea ano ia kahore nei he tino take nui hei arai mo ta ratou haere ) i te mea kei te noho marama nga take o aua hui.

*Whakaaetia ana.*

26. Na Rev. H. Pahewa raua ko Rev. R. Te Aihu :—

He nui te hiahia o tenei Hui kia kitea he himene e ata tau ana mo te marena.

*Whakaaetia ana.*

27. Na Rev. R. Haumia, he patai ki te Pihopa :—

Me kore e ahei e te Pihopa kia perehitia te Raihana marena a te Pihopa ki te reo Maori ?

I utua e te Pihopa :—

He Raihana ano kua perehitia i mua ake nei ki te reo maori.

28. Na Rev. H. Pahewa raua ko Hori Tohungia :—

He mihi aroha atu na te Hui nei ki a Te Wiremu, Atirikona mo tona kaha ki te awhina ki te whakahaere i nga moni i roto o te Hahi Maori. A, ma te Atua ia e manaaki, e tiaki.

*Whakaaetia ana.*

29. Na Tame Arapata, he patai ki te Pihopa :—

He mea tika ranei te marena Momona i te tane raua ko te wahine i runga i te mea he mihinare anake raua ?

I utua e te Pihopa :—

Kahore rawa e tika kia haere nga tangata o te Hahi ki te Momona kia marenatia ; otira i te mea kua oti te marena, ahakoa na te Momona, e kore e taea te wehewehe i runga i te marena. Kei te mana ta te Karaiti kupu “ Hei kikokiko kotahi raua.”

30. Na Rev. Hemi Huata, he patai ki te Pihopa :—

Mehemea e ahei ana kia uru nga minita hei tiamana, hei mema ranei, mo nga komiti Marae ?

I utua e te Pihopa :—

Kahore i pai kia uru te minita a te Hahi ki ngo Komiti Marae, kei raruraru i reira te mahi i whakaritea hei mahi tuturu mana.

31. Na Utiku Paetaka raua ko Rev. R. Haumia :—

E whakamihi ana tenei Hui ki a Rongo-whakaata mo ta ratou whakamanuhiri i nga tangata o te Hui : ma te Atua ratou e manaaki e tiaki.

*Whakaaetia ana.*

I whakamutua te Hui e te Pihopa ki te manaakitanga.

I panuitia, i whakapumautia, Maehe 11, 1902.

W. L. WAIAPU, UPOKO.

## TE RIPOATA

O TE KOMITI HEI WHIRIWHIRI I NGA MOTINI MO  
TE WERO A TE WIREMU, ATIRIKONA.


Ko te whakatau tenei a te Komiti :—

1. Kahore e taea te whakatau kia whakaaetia tenei, tera ranei, o nga motini, inahoki kua kiia e te Atirikona e kore e whakaaetia e ia kia peratia. I kitea hoki mehemea e whakaaetia ka patua nga wahi mate, ara nga wahi ngoi-kore, o te Pihopatanga e hiahiatia ana e te Atirikona kia awhinatia.

2. E mea ana te Komiti me waiho kia takoto topu te moni e kohia ana hei Tahua Oranga Minita Maori mo te Pihopatanga, me haere tonu hoki te kohikohi puta noa i te Pihopatanga tanga i runga i te whakahaerenga ka timataia ki te takiwa o Waiapu i tenei tau. Kua karangatia he hui nui ki reira hei kohikohi moni mo te wero a Te Wiremu, a ki te whakaro ake he nui te moni e kitea.

3. E mea ana te Komiti he huarahi pai tenei, me karanga hoki he hui pera e nga tangata o era atu takiwa o te Pihopatanga.

A. F. WILLIAMS,  
TIAMANA.



## RIPOATA


O TE KOMITI WHIRIWHIRI I NGA MAHI MANA.

I runga i te whiriwhiri a tenei Komiti kitea ana kaore kau he kino o nga mahi mana ina tika te whakahaere. I puta ano te mihi a tenei Komiti mo te nui rawa o nga moni e kohia ana mo nga whare-karakia, mo nga kawanga whare i runga i nga whakahaere mana.

E hiahia ana tenei Komiti ki te whakatakoto i enei tikanga e wha, hei whakatupato i nga tangata e whakahaere ana i nga waiata i nga haka i nga kawanga whare :—

1. Kia kore te whatiwhati o nga hope.
2. Kia kaua nga wahine e whakararuraru i nga teka nga tane, nga tane hoki i a nga wahine.
3. Kia pai te takoto o nga kupu o nga waiata, o nga haka.
4. Kia mau ano te tarau poto i raro iho i te piupiu.

F. A. PENETI,  
TIAMANA.



### NGA TAHUA ORANGA MINITA O IA PARIHA O IA PARIHA.

|            |     |     |     | £   | s. | d. |
|------------|-----|-----|-----|-----|----|----|
| Mohaka     | ... | ... | ... | 200 | 0  | 0  |
| Wairoa     | ... | ... | ... | 200 | 0  | 0  |
| Nukutaurua | ... | ... | ... | 200 | 0  | 0  |
| Turanga    | ... | ... | ... | 400 | 0  | 0  |
| Whangara   | ... | ... | ... | 429 | 1  | 6  |
| Tokomaru   | ... | ... | ... | 368 | 13 | 9  |
| Whareponga | ... | ... | ... | 326 | 0  | 2  |
| Tuparoa    | ... | ... | ... | 225 | 0  | 0  |
| Te Horo    | ... | ... | ... | 400 | 0  | 0  |
| Rangitukia | ... | ... | ... | 216 | 0  | 0  |
| Kawakawa   | ... | ... | ... | 400 | 0  | 0  |
| Te Kaha    | ... | ... | ... | 468 | 14 | 0  |

